

## پونہ مری ژیبیک

ای آنوس پورا کوسی ای بس پونہ شاخخے تان دوروت شوئی توری  
استانی۔ گرانش شروع بیٹی چشکال شوخی اوشوئے۔ ای ژاغا پونہ  
توری لوژتانی کہ ہتیتان دیہو روئے غول بیٹی کیاغ کورونیان۔ شویا توری  
سلام بشاراوالار اچی معلوم ہوئے ہیتان دیہو پون خراب بیرو بیرائے۔ ہتو  
ساوژئیکو بچن سف دیہ ای بیٹی گیرو بیرانی دیہو خیریتو خبار گنیتانی۔  
دیہو روئے دی لنگرآبادو چہ شک ملگیریان پوشی خوشان ہونی و ا  
سفر و خیر و خبرو گنیتانی۔ دیہو ای موش ریتائے کہ حال بور اسپہ ای  
بیٹی بیسی۔ تمام دیہو روئے پونو ساوژئے انتظارا استانی، کھیو انتظار  
شیر رے خبار گنیکو معلوم ہوئے کہ ہیتان دیہو ای ژور ہے کورمو  
ژاغو شوہ موش وینی بیرائے۔ ہتو مری بندئیرو بیرانی۔ و ہے دیہو  
رویانتے مریو شاپیک انگیکو بیرو بیرانی۔ پھوک نیشی خسمتی نیزیکار  
اچی دودیریار ای کما جون ویشکو بارئے یی نیسانی۔ نسہ توری  
ویشکو مریو شاپیکو رویان نسہ لکھیتانی۔ دیہو لوٹھوروان ویشکو  
سوری زاپو اچی کوری شاپیکان لوژیتانی۔ لوٹ رونخیرو ورغان موژو پختی

ای ٹھوشٹہ قلائی بت، سوری خیستہ شاپیک چالپکی پاچئے وا ای  
نفری شیستو ٹیکی گنی غیژی ہوستہ کوری۔ سف روئے ای بیٹی مریو  
شاپیکو ژوتی ای بیٹی راہی ارینی پونو موژی لنگرآبادو اوچہ ملگیریان  
سار سفرو حال احوال خبارو گناو دورو وشکی راہی ارینی۔ لنگرآبادو نانو  
اوچہ تو دورو رویان غیچ پونہ بہچی اوشوئے۔ چھو چہ ژوت کیشیپی  
شیقہئے مشقری دیتی استائے وا چھوچیو ٹیمہ اوژ گورر یپھی  
بردو یودی گیکو پیشنگوئی بیٹی اوشوئے۔ وا چھوچیو پھیرا انگار دی چوژی  
اشوئے۔ ( چھوچیو وختہ انگار چوژیک جم خبار نو بوئے مگم چھوچیو  
انگار چوژیک جم خبار گیکو پیشنگوئی بوئے) تاو پینھی اسیکہ  
شاپیک دی تراچ بی اوشوئے ( شاپیک کورا موژتو کی اوچھیتائے کا  
گیکو اشارہ) وا شاپیک بار دی گنی اوشوئے ( شاپیک ایغو ٹیکی کی  
نیسائی بار گنیک ریر ہمو مطلب ہیہ کی کا نشان گنی گونیان) وا  
لنگرآبادو نانو شون دی دروخواو اوشوئے۔ ( شون دروخیکو مطلب ہیہ کہ  
کا گونیان دوچھار بونی) ہمی سف کورمان ظاہر بیک لنگرآبادو چہ  
ملگیریان تندرستیو سورا دوروت گیکو غئیبی پیغامات اوشونی۔ شامار

غیریکو دیہا تورتانی دیہو روئے دی استانی ہے موژی دیہو ای لوگار  
غوٹ دی استائے۔ دئیے نست ہوئے۔ ہسے لنگر آبادو گیکو مشقریو  
دیکو بچن تیز بغائے۔ غوٹ دورا توری مشقری دیکو سف خوشان بیٹی تو  
تے مشقری انگیالی پرانی۔ سف بیری نیسی انتظار ارینی۔ دودیریا  
بتیتان پوشیتانی۔ نست دورو خیشیق بیتان سوم تورتانی۔ خیشیقان سوم  
دوچار بیٹی بیتان تے گڑاک پرانی۔

برونہ دوروتیں شوئیتانی، دور دوری دی پروشٹ گیتی تورتانی ایغو سوم  
دوچار ہونی، گوردوغو باران یو خا میئتانی گوردوغو سورار تھوخ نیساو  
اوشوئے۔ دوری بی نیشیکو سوم شک ملگیری تان سامان گنی تان تان  
دوران تے بغانی۔ لنگر آبادو تے دی خوشان بیٹی تان کوراوا دولپہہ  
شیمینو کورمو بند اریر۔ نان شو توغ لچھئیک شروع اریر کوریکو سفرا  
خدمت بیٹی شو توغ پیکو ڈٹیک نو چھامونی۔ خدمتی نیزیکار اچی  
سامان زراٹھیتانی وا بیتان تان ژاغین لکھیتانی۔ نوغ انگیرو اشواریان  
موژی ای روش کوریکو دیوا وا ای بوتھالہ چھوتیو تیل اوشوئے بیتان

سخت اختیاطو سورا لکھیتانی۔ اوپتی انوس دیوو چاکیئے دیہو رویانتے  
چاشٹ دیکو انتظامو ارینی لنگر آباد خسمت بیٹی استائے پھوک  
شاپیک ژوتی تیزپوریکو بغائے۔